


EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA AMATA LUA



AUKUSO - TESEMA

2023

VASEGA AMATA LUA - FA'ASOLOGA O MATAUPU
AUKUSO 06 – SETEMA 24 / NOVEMA 05 – TESEMA 10, 2023

<u>ASO/MASINA</u> <u>TUSI FAITAU</u>	<u>MATAUPU</u>	
1. Aukuso 06, 2023	Amataga Fou – Avanoa Maua Pea	Mataio 18:21-22
2. Aukuso 13, 2023	Amataga Fou – Ua Ou Filifilia le Mea Fou	Efeso 4:22-24
3. Aukuso 20, 2023	Amataga Fou - Fa'amatu'u:Tu'u i le Atua	Isaia 55: 6-9
4. Aukuso 27, 2023	MATAUPU FA'AMANATU	
5. Setema 03, 2023	O le Tatalo a le Ali'i - E Mafai Ona Ou Tatalo	Luka 11:1-4
6. Setema 10, 2023 Salamo 5:1-7	O le Tatalo a le Ali'i – E Mafai Ona Ou Vivi'i i le Atua	
7. Setema 17, 2023 11:22-24	O le Tatalo a le Ali'i – E Mafai Ona Ou Talitonu	Mareko
8. Setema 24, 2023	SU'EGA	
9. Oketopa 2023	MALOLOGA O LE LOTU TAMAITI	
10. Novema 05, 2023 Esoto 15:2	Fa'agasologa o le Aso Fa'afetai – Mose ma Miriama	
11. Novema 12, 2023 1 Samuelu 2:2	Fa'agasologa o le Aso Fa'afetai – Na Fa'afetai Hana	
12. Novema 19,2023 Filipi 1:3	Fa'agasologa o le Aso Fa'afetai – Na Fa'afetai Paulo	
13. Novema 26, 2023	O Faataoto – O Se Uo e iai lona Manaoga	Luka 11: -13
14. Tesema 03, 2023	MATAUPU FA'AMANATU, AFA LONA LUA O LE TAUSAGA	
15. Tesema 10, 2023	SU'EGA FA'AI'U O LE TAUSAGA	
	MALOLOGA	

MANUIA GALUEGA O LENEI TAUSAGA

ASO SA: AUKUSO 06, 2023

MATAUPU: “AMATAGA FOU: “AVANOA MAUA PEA”

TUSI FAITAU: MATAIO 18:21-22

Sini: Ia iloa e tamaiti le alofa tele o le Atua ia i latou, e ala i lona ofoina mai o Lana meaalofa o le Ola e Fa'avavau e ala ia Iesu, o Lē latou te maua mai ai amataga fou. Ia maua le loto fa'amagalo.

FESOASOANI MO LE FAIAOGA:

Fa'atalofa atu i lau susuga i le faiaoga, malo le onosa'i i le galuega. Taofi ua maua se fa'asiliga malosi, a o feagai ai ma le malologa o le tau-mafanafana. E pei ona silafia o le Vaega Amata lenei, o le tausaga 2-6. O le fa'amoemoe mo nai fanau iti ia, ia amata fa'amasani la latou fa'alogi i tagata o le Tusi Paia. E amata lava i le pepese i fatuga masani a le Aoga Aso Sa, e teuina i o latou loto ma le manatua e fesoasoani i o latou ola tuputupu a'e. Ia totōina fo'i le fatu o le Afioiga a le Atua i o latou loto, e ala i lesona o le a'oa'oina ma fa'alogi i ai i lea Aso Sa ma lea Aso Sa. Ia fesoasoani atu pea le Atua i lau Susuga a le Faia'oga ia saga tului atu le 'oa o manatu ma auala eseese e fa'atino ai lau galuega. Ia saga tupu atili ai le fiafia i le fanau e o mai le A'oga Aso Sa i lea Aso Sa ma lea Aso Sa.

FESOASOANI MO LE MATAUPU:

1. O le tusi faitau ua tu'uina atu; e mo lau Susuga i le faiaoga, ia faitau manino ma malamalama lelei i ai, e sauni lelei ai lau tapenaga mo le mataupu a le fanau.
2. Ia a'oa'o ma fa'amasani fanau i le tatalo e amata ai le a'oga.
3. E lelei ona amata lau a'oga i se tala fiafia mo le fanau, po'o ni nai pese fo'i se lua e fa'aosofia ai lagona fiafia o le fanau. E mafai fo'i ona fai sina ta'aloga upu, po'o se isi gaioiga e saunia atili ai mo le lesona.
4. Fai fesili masani o le Tusi Paia e fa'amasani ai la latou fa'alogi ma ia fai ma a latou tauloto.
5. Ia sauni mai ni nai taga alaisa laiti, po'o nisi fatu e fa'aaogā i le ta'aloga **Togitogiga pei ona lisi atu.** .
6. Ta'u ia malamalama tamaiti i le so'oga o le ta'aloga ma le mataupu o le asō.
7. Fa'amatala le tala.
8. A mae'a le mataupu, ia fa'amanuia i fanau, ia usuina se pese, ma ia faia se tatalo e tu'u ai, ma sauni mo le sauniga.

FESILI:

- O ai na fesili iā Iesu? (**Peteru**)
- Fa'aali mai i ou tamatama'ilima: Fai mai Peteru - E fa'afia ona fa'amagalo se isi pe a sesē mai iā te oe? (**Fitu**)
- Ae fia taimi na fai mai Iesu e te fa'amagalo atu ai i lou uso pe a sesē mai iā te oe? (**7 fa'atele i le 7**)
- O lona uiga a sili atu loa i le 490 taimi, ona gata loa lea o lau fa'amagalo? (**Leai. O lona uiga ia tatou fa'amagalo pea tusa pe tele ni sesē o le isi tagata. Aemaise lava pe a ua lagona e le tagata lena lona sesē.**)

PESE: “TULEI ESE, TULEI ESE, TULEI ESE.

TATALO: Faafetai Tama mo lau meaalofa na ala mai ia Iesu, Faafetai mo lenei amataga fou, ia faamanuia mai ia i matou lau fanau, ona o Iesu la matou amataga fou... Amene.

TA’ALOGA: *Togitogiga* (Keep Tossing)

Ia Manuia Tele le Aso Sa.

TOGITOGIGA - (KEEP TOSSING)

E fiafia tamaiti i avanoa e tele o le a latou maua e togi ai a latou taga fatu i se apa lapo’a; ma taumafai e fa’aulu.

NISI MATAUPU TALAFEAGAI:

Fa’amagalo, Alofa, Salamō

MEA E MANA’OMIA:

3 taga sanuisi ua utu i alaisa
2 ipu supo lapopo’a, po’o ni afa fafano,
Masking tape



UMI O LE TA’ALOGA:

Pe a ma le 5- 10 minute

TAPENAGA:

Fa’aaogā le masking tape e maka ai le amataga o le laina; e fa’asolosolo aga’i tua tamaiti, Tu’u apa fafano e lua i luma, e fa’apito mai le isi i luma, ae fa’amaomao atu le isi i tua. E faigofie ona ulu le togi i le apa lea e pito mai luma.

FA’ATONUAGA O LE TA’ALOGA:

O le a taumafai uma e togi a tou taga i le apa lea e pito mai luma. A ulu lau togi, ona taumafai lea e tgi i le isi apa la e mamao atu i tua. Pe ulu lau togi pe leai, a uma ona e togi, ona e alu lea e toe ao mai taga ma tu’u i le isi tagata e soso’o ai. Afai na misilau togi, ona e alu lea i tua o le laina e toe taumafai mai ai. E fai pea le tatou ta’aloga se’i loga ua tofua uma le tagata ma le avanoa e togi ai ia ulu i le apa muamua. (Afai e iai pea ni tamaiti e le’i ulu ni a latou togi, ona tu’utu’u mai lea fa’alatalata le apa ina ia faigofie ona ulu le togi).

FA’ATATAU: O le tatou ta’aloga na fai nei, e fa’aali mai ai, e iai taimi e mana’omia ai ni avanoa fa’aopoopo e fai ai se mea se’ia mae’a lelei ma taunu’u manuia. E tāua le onosa’i ma fai pea, ae ‘aua le fiu gofie ma musu E silafia e le Atua, e iai taimi e lē i’u manuia ai mea tatou te faia, ae mafai e Iesu ona saunia auala e manuia ai a tatou taumafaiga. .

ASO SA: AUKUSO 13, 2023
MATAUPU: “AMATAGA FOU: “UA OU FILIFILIA LE MEA FOU”
TUSI FAITAU: Efeso 4: 22, 24

Sini: Ia a’oa’oina tamaiti ia iloa pe fa’afefea ona tu’u ese le tagata tuai ae o’ofu i le tagata fou iā Iesu.

FESOASOANI MO LE FAIAOGA:

Mālo le onosa’i i le galuega. O le mataupu o le asō, o se tasi o mataupu fa’avae o le tatou talitonuga, ua fa’afaigofie mo le fanau. O le tatou talitonuga, e fa’avae lava i a’oa’oga a le Tusi Paia: E suia le tagata tuai, fa’aletonu ma le agasala e avea ma tagata fou pe a talitonu ia Iesu ma mafuta ia te Ia, O le mea mo’omia le sui o uiga tuai ma lē lelei, i ni uiga fou ma lelei. A leai se ata e talafeagai ma le lesona, e aogā tele fo’i gaoioiga fa’atino (*activities*) pupu’u e fa’alatele ai le uiga o le mataupu. O le fa’atinoga filifilia mo le tatou mataupu, o le fa’aali o ni mea tuai ma lē lelei, fa’atasi ma ni mea fou o ituaiga tutusa. Ona filifili lea o tamaiti po’o a mea e tatau ona tu’u, ae po’o a fo’i mea e tatau ona sui, ae pe aiseā. Ia ta’u i tamaiti e fa’apena o tatou loto pe a tumu i ni uiga lē lelei. E mana’omia le sui, ae o le galuega lena a le Agaga o le Atua. Ae fai e tatou le filifiliga e sui pe lē suia fo’i.

FESOASOANI MO LE MATAUPU:

- 1 O le tusi faitau ua tu’uina atu, e mo lau Susuga e te faitau manino ma malamalama lelei i ai. E fesoasoani i le tapenaga o le mataupu mo lenei aso sa.
2. O le mataupu o le filifilia o se mea fou e sui a’i se mea ua tuai, pe leaga, po ua le tatau ona toe fa’aaogāina; sui loa.
3. Fa’amatala fa’afaigofie le tagata ua faia se tulaga sesē po’o se mea leaga, ma ua tatau ona tu’u pe sui.
Va’ai le fa’atusa o se ofu ua palapalā pe masae, ma ua tatau ona tatala, aveese, ae sui i se ofu māmā.
4. E fa’apena le eleelea po’o le palapalā o le loto o se tagata ua agasala, ma ua lē o mafuta ma Iesu.
5. Sauni ni mea ta’ilua i le ituaiga. O le tasi e fou a’o le isi ua fa’aaogā, pe masae, po ua amata ona malepe.
(Ni ofu, ni pea totini, ni peni vali ata, ma ni meata’alo).
6. Ta’u ia malamalama tamaiti i le feso’ota’iga o le gaoioiga fa’atino ma le mataupu o le asō.
7. Fa’atino le gaoioiga **“Ou te mana’o i le mea fou.”**
8. Fa’ai’u i le **FA’ATATAU:**

Tou te iloa o le mea fo’i lena e mana’o ai le Atua mo tatou? Ou te lē fai atu tou te o e tia’i uma tou ofu tuai ma isi mea uma ua tuai, ina ia aumai ai e le Atua ni mea fou mo outou; ae o le a’oa’oga o le tatou tala lenei - E mana’o le Atua e tia’i ma aveese uma mea tuai ma le lē aogā i o tatou tino, loto ma mafaufau, (Mea pei o le ita, fa’anoanoa, pepelo, lē usita’i, fa’alogogatā, tagovale, etc.) ae fa’atumu mai e Ia i mea lelei ma le fou (pei o le alofa, fiafia, filemu, onosa’i, fa’amaoni, agalelei, usita’i ma le amio mamā). O ituaiga uiga fou ia e maua pe a tatou ola pei ona fa’aa’oa’o mai e Iesu. Ia tatou talitonu ma fa’atuatua ia te Ia, ona mafai lea o so’o se mea.

FESILI:

- Afai ua tatou iloa Iesu ma alolofa ia te Ia, o tatou ni tagata fou pe tuai? (*Fou*)
- O le a le mea ua te'a ese? (*Tagata tuai*)
- O le a lea mea e ta'u o le tagata tuai? (*Amio na masani ai. Lē usita'i, augatā, pepelo, etc.*)
- Aiseā e tataua ai ona sui le tagata tuai i le tagata fou? (*Auā o le tagata tuai e lē iai Iesu, a'o le tagata fou ua talia Iesu ma fai ai amio fou e pei ona fa'aa'oa'o mai e Iesu*).

PESE: "MATAGOFIE, E LELEI" / "Beautiful, beautiful, Jesus is Beautiful".

Ia Manuia Tele le Aso Sa.

OU TE MANA'O I LE MEA FOU – (I WANT THE NEW)

O le a iloa e tamaiti ma fiafia i le maua o ni mea fou, ma o le a fa'afeso'ota'i e latou ma le a'oa'oga o le mana'o o le Atua ia tatou fiafia i mea fou e maua iā Iesu Keriso.

NISI MATAUPU FESO'OTA'I:

Fanau a le Atua, Fa'atuatua, Alofa Tunoa,
Agasala



MEA E MANA'OMIA:

Se ofu fou, ma se ofu tuai ua masae
Se pea totini fou ma se pea totini fou,
Peni vali(crayons) fou, ma ni peni ua fa'aaogā
Se ta'avale ta'alo fou, ma se isi meata'alo tuai

UMI O LE TA'ALOGA:

Pe a ma le 5 minute

TAPENAGA:

Tu'u uma mea ia i luga o se laulau i luma i le vasega. Fai i tamaiti e va'ai lelei iai ma tu'u i ai nai minute e vā'ai ai.

FA'ATONUGA O LE TA'ALOGA:

Ou te mana'o ia outou vā'ai lelei i mea nei. Iloilo ma fa'atusatusa i le tou va'ai. Ona ta'u mai lea pe iai se mea ua outou iloa? Ni eseese po'o ni itu fo'i e tutusa ai. E tutusa ituaiga, ae fou le isi ae tuai le isi, e sa'o?

- O lē fea o ofu ia e te filifilia? (Si'i uma i luga ofu e lua.)
- O lē fea pea totini e te filifilia? (Si'i uma i luga pea e lua.)
- O fea peni vali e te filifilia? (Si'i uma i luga peni vali fou ma le tuai.)
- O lē fea meata'alo e te filifilia? (Si'i uma i luga meata'alo e lua.)

O le to'atele lava o tatou e manana'o ma filifili mea fou, a ea? O le a se tou manatu, aiseā e filifili ai e tagata mea fou? Tu'u sina taimi i tamaiti e tali mai ai. (*Pe ona e fou, mamā, manaia, e le'i fa'aaogaina, etc*)

FA'ATATAU:

Tou te iloa o le mea fo'i lena e mana'o ai pe finagalo ai le Atua mo tatou? Ou te lē fai atu tou te o e tia'i uma tou ofu tuai ma isi mea tuai uma, ina ia aumai ai e le Atua ni mea fou mo outou; ae a'oa'oga o le tatou tala lenei: E mana'o le Atua e tia'i ma aveese uma mea tuai ma le lē aogā i o tatou tino, loto ma mafaufau, (Mea pei o le ita, fa'anoanoa, pepelo, lē usita'i, fa'alogogata, tagovale, etc.) ae fa'atumu mai e Ia i mea lelei ma le fou (pei o le alofa, fiafia, filemu, onosa'i, fa'amaoni, agalelei, amio pulea ma le amio mamā). O ituaiga uiga fou ia e maua pe a tatou ola pei ona fa'aa'oa'o mai e Iesu. Ia tatou talitonu ma fa'atuatua ia te Ia, ona mafai lea e i tatou o so'o se mea.

ASO SA: **AUKUSO 20, 2023**

MATAUPU: **“AMATAGA FOU: “FA'AMAMULU – TU'U I LE ATUA”**

TUSI FAITAU: **Isaia 55: 6-9.**

Sini: Ia iloa e tamaiti e tatau ona tu'u fuafuaga i le Atua, ae le'i fa'ataunu'uina se fa'amoemoe.

FESOASOANI MO LE FAIAOGA:

Mālo le galulue. O le tusi na ua avatu e faitau manino ma su'esu'e ai fo'i. O le tatou mataupu, e sosolo lava i le fa'asologa o manatu fa'avae e pei ona sau ai lesona e lua ua mavae. O le talitonuga fa'a kerisiano, e fa'amatu'u pe lafoa'i a tatou fuafuaga i le Atua, na te fa'atonuina o tatou ala. Auā e sili lona silafia i lo tatou. O sina fa'amatalaga pu'upu'u ma le fa'afaigofie. O le vala'au a le perofeta o Isaia i le nu'u o Isaraelu, e tu'u le agasala ma uiga tuai o lo'o latou faia, ae sa'ili mai i le Atua manū o maua le avanoa. E sa'ili mai fo'i i le Atua auā e sili atu ona lelei ma manuia ala ma manatu o le Atua, nai lo latou ala ma manatu.

FESOASOANI MO LE MATAUPU:

- 1 O le tusi faitau lena a Isaia. Tu'u i le Atua a tatou fuafuaga e manuia ai. O le tusi faitau e fesoasoani i lau tapenaga o le mataupu mo lenei aso.
- 2 O le mataupu o le tu'u o ala tuai ma mea sa masani ai Isaraelu, aemaise mea ua latou fuafuaina mo lo latou lumana'i, ae fa'asaga mai i le Atua. E lelei ma sili atu manatu ma ala o le Atua nai lo latou ala ma manatu. Ia fuafua fa'atasi ma le fa'atuatua ma fa'alagolago i le fa'asinoga a le Atua
- 3 E ui ina fai fuafuaga a le tagata, ae na te le ma iloa nisi mea lē fuafuaina e tula'i mai, auā tatou te lē pulea le lumana'i, ae silafia ma pulea uma e le Atua.
- 4 O se tala e fa'amalamalama atili ai le lesona. O le tala i se aiga na sauni la latou malaga tafafao i Amerika.
 - Ua siaki atoa le ta'avale ma fa'amautinoa ua lelei mo le malaga umi.
 - Ua fuafua aso ma taimi e taunu'u ai i nofoaga eseese e fia asiasi i ai, nu'u e malolō ai ma a'ai ai.
 - Ua fa'ata'atia le auala e ui ai, ma le umi o le malaga.
 - Ua alu le malaga, ae le'i iloa ma lē mafai ona latou fuafuaina nisi mea o le a tutupu i le ala.

- Na pa le pa'u o le ta'avale, ma fa'atali se'i sui. Na ma'i le tamaitiiti, ma tatau ona ave i le falema'i.
 - Na oso le asiosio ma pa'u'ū ai la'au i le auala, ua poloka ai. Ua alu ai isi aso na fuafua o le malaga.
 - Ioe, po'o le a le foliga lelei o a tatou fuafuaga, e tele nisi mea e lē mafai ona o'o iai lo tatou malosi. Na'o le Atua na te pulea mea uma, ma silafia mea e tutupu i le lumana'i tatou te le iloa. E sili la le tu'u i le Atua o a tatou fuafuaga uma, na te fa'atonuina mai.
- 5 Fa'atino le gaoioiga **“Fa'amamulu: Tu'u i le Atua.”**
- 6 Fa'ai'u i le uu-lima faatasi ma usu le pese o loo i le lesona.

FA'ATATAU:

O le a se a'oa'oga fou ua tatou maua i le aso lenei? *E mafai ona tatou fuafua mea tatou te manana'o e tutupu, po'o le i'uga o sa tatou taumafaiga, ae iai nisi taimi e lē mafai ona tatou pulea le i'uga, e sa'o? E tatau ona tatou fa'atuatua i le Atua e tausi i tatou, ma mafuta ia te Ia i le tatalo, ina ia i'u manuia mea tatou te fuafuaina, tusa po'o le a le foliga faigata pe lē mafai.*

FESILI:

- E tutusa manatu o le Atua ma o tatou manatu? *(Leai)*
- O ala o le Atua, o tatou ala fo'i na? *(Leai.)*
- E maualuluga atu pe maualalo ifo aiseā ala o le Atua nai lo tatou? *(Maualuluga)*
- O le a sou manatu, e lelei pe leaga le sili atu o manatu o le Atua nai lo tatou? *(Tu'u le avanoa e tali mai ai i mea ua latou lagona).*

PESE: “FA'ATUATUA I LE ATUA” / “Have faith in God”.

Ia Manuia Tele le Aso Sa.

FA'AMAMULU; TU'U I LE ATUA - (LET GO, LET GOD)

O le a fiafia tamaiti e fa'amamulu a latou paluni, ae vā'ai po'o fea e o iai. Tata'i mai i le so'otaga o lenei a'atinoga ma le lesona. Ia fa'amamafa le a'oa'oga, e fa'apena o tatou olaga pe a tu'u i le Atua. O Ia e pulea. Tatou te le iloa le lumana'i ma le mea e aga'i i ai, ae a tatou tatalo ma fa'atuatua i le Atua e ta'ita'i o tatou ala, ona tatou mautinoa lea o le a i'u manuia.

NISI MATAUPU FESO'OTA'I:

Fa'atuatua

MEA E MANA'OMIA:

Ni paluni (fa'atatau i le aofa'i o tamaiti)
Se tape e fa'aailoga ai ni tafafā (sikuea) i le fola
Se peni maka e tusi ai igoa i luga o paluni



UMI O LE FA'ATINOGA:

Pe a ma le 10 minutes

TAPENAGA:

Fa'aogā le tape e maka ai ni tafafā (sikuea) i luga o le fola, pe 3 pe 4 fo'i. Tusi igoa o tamaiti i a latou paluni. Ae tusi upu ia i le isi itu: *Fa'amamulu, Tu'u i le Atua.*

FA'ATONUAGA O LE FA'ATINOGA:

O le tatou fa'atinoga lea o le a fai i paluni. A uma ona feula tou paluni ma nonoa mau; ma ua tusi ai tou igoa, ona tusi lea o upu ia i le isi itu, **FA'AMAMULU TU'U I LE ATUA.** Ua tou va'ai i sikuea ia i luga o le fola? Ta'u mai e le tagata po'o le fea sikuea lena e te mana'o e pa'u iai lau paluni, pe a fa'amamulu. Fa'asolosolo ta'ito'atasi i le pito mamao o le potua'oga, ma fa'amamulu lau paluni, ona va'ai lea po'o fea e pa'u i ai.

O le a se a'oa'oga fou ua tatou maua i le aso lenei? *E mafai ona tatou fuafua mea tatou te manana'o e tutupu, po'o le i'uga o sa tatou taumafaiga; ae iai nisi taimi e lē mafai ona tatou pulea le i'uga, e sa'o? E tatau ona tatou fa'atuatua i le Atua e tausi tatou, ma mafuta ia te Ia i le tatalo ina ia i'u manuia mea tatou te fuafuaina, tusa po'o le a le foliga faigata pe lē mafai.*

ASO SA: AUKUSO 27, 2023
MATAUPU: LESONA TOE FAAMANATU
Sini: FESILI MA TALI

FESOASOANI MO LE FAIAOGA: Taofi ua maua foi se faasiliga-malosi o lenei taeao fou i lau susuga a le faiaoga, e faatalofa atu ai i a outou susuga. O fesili lava o mataupu ua mavae atu.. Ae tapena ane e lau Susuga le su'ega tu'ugutu (Oral Test) a le fanau i fesili ua saunia, e toe fa'amanatu ai a latou mataupu e tolu ua tuana'i. O le fa'amoemoe taua lava mo nai fanau laiti, ia fa'amasani la latou fa'alogi i tagata o le Tusi Paia, ma ia aveva ma fa'avae o lo latou ola a'oa'oina i le Tusi Paia i le aga'i atu pea i le lumana'i

FESILI:

1. O ai na fesili iā Iesu?
(Peteru)
2. Fai mai foi e a Peteru - E fa'afia ona fa'amagalo se isi pe a sesē mai iā te oe?
(Fitu)

3. Ae fia taimi na fai mai Iesu e te fa'amagalo atu ai i lou uso pe a sesē mai iā te oe?
(7 fa'atele i le 7)
4. O lona uiga a sili atu loa i le 490 taimi, ona gata loa lea o lau fa'amagalo?
(Leai. ia tatou fa'amagalo pea tusa pe tele ni sesē o le isi tagata.)
5. E tutusa manatu o le Atua ma o tatou manatu?
(Leai)
6. O ala o le Atua, o tatou ala fo'i na?
(Leai.)
7. E maualuluga atu pe maualalo ifo aiseā ala o le Atua nai lo tatou?
(Maualuluga)
8. Afai ua tatou iloa Iesu ma alolofa ia te Ia, o tatou ni tagata fou pe tuai?
(Fou)
9. O le a le mea ua te'a ese?
(Tagata tuai)
10. O le a lea mea e ta'u o le tagata tuai?
(Amio na masani ai. Lē usita'i, augatā, pepelo, etc.)

Mālo le galulue i lenei taeao fou, faafetai le lagolagosua i le galuega. Faamolemole, Ia saunia ane e lau susuga ni pese se tasi pe lua, e toe usu ma faamasani ai nai fanau ia manatua pea le tāua o mataupu ua tuanai atu. A ma'ea ona saunia loa lea o se tatalo e tatalo faatasi ai ma nai fanau, ma ia faamanuia ia i latou uma.

Ia manuia tele le Aso Sa

ASO SA: SETEMA 03, 2023

MATAUPU: “O LE TATALO A LE ALI'I: “E MAFAI ONA OU TATALO”

TUSI FAITAU: Luka 11:1-4

Sini: Ia iloa e tamaiti e a'oa'o tatou e Iesu e tatalo, ma e mafai ona latou tatalo.

FESOASOANI MO LE FAIAOGA:

O le lesona amata lenei o le vaega: O le Tatalo a le Ali'i, E lelei le fa'aali o ni nai ata, pe usu ni pese e feso'ota'i ma le lesona, e fa'aosofia ai le fia fa'alogo o nai fanau ma ua'i mai i le mataupu. Taluai ona o se mataupu masani ma le lauiloa *Le Tatalo a le Ali'i*, e ono vave ona aga'i le fa'amatalaga i isi vaega o le tatalo ma a'oa'oga e maua mai ai. Manatua, ua vaevaeina ai le Tatalo a le Ali'i i ni vaega se ono; o le fautuaga, ia taumafai e sosolo pea i le manatu o lo'o feagai ai i le asō, ona o lo'o mulimuli mai fo'i isi lesona e aofia ai isi vaega o le tatalo. O le fa'atomuaga lenei, ua a'oa'o e Iesu ona so'o i le tatalo, ina ua fesili i ai le tasi o le 'au so'o: Le Ali'i e, ia e a'oa'o mai ia te i matou i le tatalo..." Ona o le a'oa'oga a Iesu i le tatalo e mo so'o se isi, o lea e iloa ai e tamaiti e aofia ai fo'i ma i latou i le a'oa'oga lenei. E mafai fo'i e latou ona tatalo.

FESOASOANI MO LE MATAUPU:

1. O le tusi faitau ua avatu e te su'esu'e ai, e 'auga i le manatu: O le Tatalo a le Ali'i.
2. E lelei ona amata i le pese, **Faitau le Tusi Paia ma Tatalo i Aso Uma**". O le fati masani toe ola.

3. Soso'o ma le fesili: "*O ai e iloa le uiga o le upu "tatalo"?* (talanoa i le Atua).
Tou te iloa, na fa'aa'oa'o e Iesu le tatalo i ona so'o? (tu'u le avanoa mo ni tali eseese)
O ai se isi e masani ona tatalo? (Lelei)

O le tatou lesona i le nei taeao, O le tatalo a le Ali'i, o le auala na fa'aa'oa'o mai e Iesu tatou te tatalo ai.

Tatou te iloa ai fo'i mea e tāua i le Atua pe a tatou talanoa ma Ia.

4. Fai mai sa tatalo Iesu i le isi aso, e uma ane, a e fesili i ai le isi ona so'o, "Iesu, e a pe a a'oa'o mai

matou i le tatalo? Fai atu loa Iesu: "*Pe a outou tatalo, ia outou fai atu:..*"

- *Lo matou Tamā e, o i le lagi; Ia pa'ia lou suafa. Ia o'o mai lou mālo. Ia faia lou finagalo, i le lalolagi e pei ona faia i le lagi.*
- *Ia e foa'i mai ia te i matou i le aso nei a matou mea e 'ai e tatau ma le aso.*
- *Ia e fa'amagalo mai ia te i matou i a matou agasala, e pei o i matou fo'i ona matou fa'amagaloina atu i e ua agaleaga mai ia te i matou;*
- *'Aua fo'i e te ta'ita'iina i matou i le fa'aosoosoga, A ia e lavea'i mai ia te i matou ai le leaga,*
- *Auā e ou le mālo ma le mana, atoa ma le vi'iga e fa'avavau lava. Amene*

5. E lelei fo'i ona toe fai auaua'i laina o le Tatalo lea, ma fa'amautinoa ua latou iloa uma.

6. E pu'upu'u le Tatalo a le Ali'i; e lē umi. E ta'u mai ai iā tatou, e le fa'apea se'iloga e u'umi a tatou tatalo

ona fa'afofoga mai lea o le Atua iā tatou. Tusa pe pu'upu'u lau tatalo, e lagona mai lava e le Atua.

7. A'oa'o upu o le pese: "**Iesu, a'oa'o mai a'u i le tatalo**" ma usu.

8. **FA'AI'U:** So'o se isi e mafai ona talanoa i le Atua e ala i le tatalo. Na aumai e Iesu iā tatou le fa'aa'oa'o i mea e aofia i a tatou tatalo. A tatou tatalo ma talanoa so'o i le Atua, o le a tupu tele lo tatou fiafia i ai.

FESILI:

1. O a ni mea na tatalo ai Iesu i lana tatalo? (*Mea 'ai, Fa'afetai, Fa'amagalo, Lavea'i, etc.*)
2. O le a le taimi e tatau ona tatou tatalo ai? (*So'o se taimi*)
3. O le a lea mea e ta'u o le fa'amagalo? (*Tu'u le avanoa e tali mai ai i mea ua latou lagona*).

PESE: "Iesu, ia a'oa'o mai a'u i le tatalo,
Iesu, ia a'oa'o ,ai a'u i le tatalo.
Ia e talia mai o lo'u mana'o,
Iesu, ia a'oa'o mai a'u i le tatalo.

Ia Manuia le Aso Sa.

ASO SA: SETEMA 10, 2023

MATAUPU: “O LE TATALO A LE ALI’I: “E MAFAI ONA OU VIVI’I I LE ATUA”

TUSI FAITAU: Salamo 5: 1-7

Sini: Ia iloa e tamaiti o le vivi’i ma fa’afetai i le Atua o se vaega tāua o le tatalo.

FESOASOANI MO LE FAIAOGA:

O le lesona lona lua lenei o le vaega: O le Tatalo a le Ali’i, O le vaiaso ua te’a na tatou talanoa i le a’oa’o mai e Iesu tatou i le tatalo. O le asō o le a tatou talanoa pe aiseā e tatau ai ona tatou vivi’i i le Atua, ae fa’apefea fo’i ona tatou vivi’i pe a tatalo. Manatua o le Vi’iga ma le Fa’afetai e o fa’atasi. E vivi’i i le Atua ona o lona Silisili Ese, lona Malosi, lona Mana, lona Alofa Lē Fa’atuā’oia, ona e telegese lona to’asa, ae televave lona Alofa! ma isi lava uiga e tele o le Atua. Ona tatou fa’afetai lea i le anoanoa’i o mea ua na faia mo tatou. O le fa’amoemoe, a mae’a le lesona o le asō ua iloa e tamaiti e tatau ona vivi’i i le Atua, o le pogai o mea lelei uma ua latou maua. E mafai fo’i e latou ona tatalo ma vivi’i i le Atua, ae le na’o tagata matutua..

FESOASOANI MO LE MATAUPU:

1. E uma le fa’atomuaga o le Tatalo a le Ali’i, soso’o loa le vaega muamua, o le Vi’iga: ***Ia pa’ia lou Suafa.***
2. E tele Suafa o le Atua tatou te ta’ua, a’o le tele o na suafa e mafua mai ona uiga. Se’i tatou iloilo ma vā’ai i nisi ona Suafa:
 - O le Tamā: Na a’oa’o mai ai tatou e Iesu. O lo tatou Tamā o i le lagi.
 - O le Tupu: E ona e Ia mea uma. E iai lona mālō i le lagi, ae amata atu i lalo nei.
 - O le Atua Foafoa: O Ia na faia le lalolagi ma mea uma, e aofia ai ma le tatou tagata.
 - O le Atua Alofa: E alofa fua. Na foa’i mai lona Alo o Iesu e maliu i le satauro, e togiola a’i tatou.
 - O le Atua Poto: E iloa mea uma; na te iloa pe fa’afefea ona galuea’ina mea ta’itasi uma.
 - O le Atua Malosi: E mafai ona Ia puipuia tatou mai so’o se mea faigata.
 - O le Atua e Saunia/Foa’i: Na te foa’i mai mea e tausii ai i lo tatou ola, pe a tatou tatalo ma le faatuatua.
3. Tatou te vivi’i ma fa’afetai e ala i ona suafa ma ona uiga, ma mea uma na te faia mo tatou.
4. E faifai pea a tatou tatalo ma vivi’i i le Atua, se’ia i’u ina tatou masani ai ma avefa ma mea fiafia.
5. E fiafia le Atua e fa’afofoga mai i a tatou tatalo ma vi’iga ia te Ia.
6. A faigata ona amata lau tatalo, e mafai ona usu sau pese fa’afetai pe vivi’i ai i le Atua.
7. Tilotilo solo i ou autafa, pe e te iloa se mea e te fia vivi’i ai ma fa’afetai i le Atua .
8. **FA’AI’U:** So’o se isi e mafai ona talanoa i le Atua e ala i le tatalo. Na aumai e Iesu iā tatou le fa’aa’oa’o
i mea e aofia i a tatou tatalo. A tatou tatalo ma talanoa so’o i le Atua, o le a tupu tele lo tatou fiafia i ai.

FESILI:

1. O le a le uiga o le vivi'i i le Atua? (*Fa'afetai pe fai ni upu e iloa ai lou loto fiafia ona o Ia ma mea uma*

ua Ia faia mo oe ma i tatou uma).

2. O ai e mafai ona vivi'i i le Atua? (*So'o se isi lava e ola ma maua le manava mai le Atua).*

3. O le a le taimi e tatau ai ona e vivi'i i le Atua? (*So'o se taimi e te manatua ai o Ia ma ona uiga lelei*)

4. Fa'afefea pe afai ou te le iloa tatalo e vivi'i ai i le Atua? (*E mafai ona usu sau pese fa'afetai ma vivi'i*).

**PESE: IA TATALO, TATALO I LE MANA O LĒ UA AFIO MAI
IA TATALO, TATALO I LE MANA O LĒ UA AFIO MAI,
SISI'I IA OU LIMA, MA VI'IA LE ALI'I
TATALO I LE MANA O LĒ UA AFIO MAI.**

Ia Manuia le Aso Sa.

E LELEI LE ATUA! (GOD IS GREAT)

O le a fiafia tamaiti e su'e ni ata eseese e a'aoa'oina ai latou e uiga i le Atua.

ULUTALA: Tatalo

MEA E MANA'OMIA: Va'ai ata eseese i lalo.

Lolomi pe fai ni kopi e fa'aali ma tufa i tamaiti.

FA'ATONUGA O LE FA'ATINOGA:

Tōtō pei se pelē. Fa'afaō ata ma tu'u i ai e piki le ata a le tagata. A tofu loa tamaiti ma le ata, ona fa'asolo lea ae fa'aali a latou ata, ma ta'u mai po'o le a se uiga o le Atua e ta'u atu e le ata iā te ia.

FA'ATATAU:

O nei ata e ta'u mai ia i tatou nisi uiga o le Atua, e fesoasoani e fa'amanatu mai ia i tatou nisi mea e tatau ona tatou vivi'i ai ma fa'afetai i le Atua pe a tatou tatalo. A tatou tatalo, ia manatua e vivi'i ma fa'afetai i le Atua mo Ia lava, ma ona uiga e tele o lo'o tatou manuia ai.

Fa'amasino (samala): O le Atua lo tatou fa'amasino; na te fa'amasinoina a tatou mea uma e fai; sesē.pe

sa'o.

Alofa (fatu): Na fai tatou e le Atua; na auina mai Iesu e maliu mo tatou, ma e lē fa'atuāoia lona alofa iā i

tatou!

Tupu (paleali'i): O le Atua lo tatou Tupu! E pule aoao o Ia i le lalolagi atoa ma mea uma.


Malosi/Mata'utia(maso): E malosi, mata'utia, ma silisili ese le Atua. E mafai ona Ia faia so'o se mea.

Fa'amagalo (lima o lo'o taofi ai le lalolagi): Na fa'amagalo e le Atua agasala uma a le lalolagi ina ua maliu Iesu mo tatou.

Puipui/Leoleo (pelu): E puipui tatou e le Atua mai le fili ma nisi e mana'o e fa'aleaga tatou.

Poto (fai'ai): E sili le poto o le Atua i so'o se isi; e sa'o ana mea uma e fai, e lē tuai fo'i sana fa'ai'uga.

Lē Aumaia (mea 'ai): O le Atua e aumaia mea uma tatou te mana'omia! O mea 'ai, lavalava, aiga, uō, ma mealofofaga uma.



ASO SA: SETEMA 17, 2023

MATAUPU: “O LE TATALO A LE ALI’I: “E MAFAI ONA OU TALITONU”

TUSI FAITAU: Mareko 11: 22-24

Sini: Ia iloa e tamaiti le tāua o le talitonu e tali mai le Atua i tatalo.

FESOASOANI MO LE FAIAOGA:

O le lesona lona tolu lenei o le vaega: O le Tatalo a le Ali'i, O le vaiaso ua te'a na talanoa ai e mafai ona tatou vivi'i ma fa'afetai i le Atua; atoa ma le tãua o le vivi'i pe a tatou tatalo, O le asõ o le a a'oa'oina e mafai ona tatou talitonu e tali mai le Atua pe a tatou tatalo. E tatau ona iloa e le fanau e saunia lelei le tatalo ma le loto ma le fa'atuatua. Fa'amalamalama le fa'atuatua. O le talitonu lena e tali mai le Atua i lau tatalo. O le fa'amoemoe, a mae'a le lesona o le asõ ua iloa e tamaiti e tatau ona tatalo ma le talitonu i le Atua. E lē na ona fa'ataunu'u le tatalo, ae fai ma le loto, E mafai fo'i e tamaiti ona tatalo ma talitonu e tali mai le Atua, ae le na'o tagata matutua..

FESOASOANI MO LE MATAUPU:

1. Faitau leo tele le fuaiupu: Mareko 11:24, "***O le mea lea ou te fai atu ai ia te outou, o mea uma lava tou te ole mai ai i a outou tatalo, inā fa'atuatua ia o le a maua e outou, ona faia lava lea mo outou.***"

Faitau fa'atolu. A iai nisi e iloa faitau, su'e a latou Tusi Paia ma faitau fa'atasi.

Fa'agesegese.

2. Fesili i tamaiti, pe iai se upu o le fuaiupu e manatua. Fa'atali mo nisi e ofo mai.
Po'o le a le upu e ta'u mai, sauni e amata i'ina le talanoaga.
3. Afai e leai nisi e ofo mai, ona fa'amatala lea o upu ia: **ole, tatalo, fa'atuatua, maua.**
4. **Ole:** *O lou fesili i se isi mo se mea e te mana'o ai. O le isi lena upu e tutusa ma le tatalo.*
5. **Tatalo:** *Talanoa i le Atua.*
6. **Fa'atuatua:** *Talitonu o le a fai e le tagata na e fesili iai le mea lena mo oe. .*
7. **Maua:** *Ua u'u i ou lima le mea na e mana'o ai, po'o ua iai le mea na e su'ea, pe fesili ai fo'i.*
8. A tu'u fa'atasi upu ia, ona maua lea o le uiga o le fuaiupu na tatou faitauina. **A tatalo pe ole se isi i le Atua mo se mea, ae talitonu i lona loto o le a fai e le Atua, ae lē masalosalo pe fa'alotolotolua, ona faia lea mo ia.** O le talitonu lena i le Atua. A fa'apena lou loto o lona uiga: *Ua mafai ona e talitonu!* .
9. A lava le taimi, ona fai lea o le FA'ATINOGA; a leai, Fa'ai'u loa.
10. **FA'AI'U:** E tãua tele le talitonu e tali mai le Atua i a tatou tatalo. O le talitonu moni i le Atua, o lona uiga e le o le fiu pe a lē tali mai le Atua i le ala tatou te manana'o ai; ae o le fa'atuatua pea e sili lana fuafuaga ma lona silafia. Ua tatou iloa o le Atua e amiotonu ma pa'ia, tatou te talitonu ai e mafai e lona mana so'o se mea, ma o le fa'ailogā fo'i lena o lo tatou fa'atuatua ia te Ia.

FESILI:

1. O a mea na ole ai Iesu i le Atua? (*Mea 'ai, fa'amagalo, ma lana puipuiga*)
2. Mata ua silafia e le Atua tatou te mana'omia mea uma na? (*Ioe*).
3. O le a le mea e tupu pe a tatou talitonu e tali mai le Atua i a tatou tatalo? (*E maua le mea na tatou ole ai, pe tupu fo'i le mea na talosia*)
4. Afai tatou te talitonu e tali mai le Atua i a tatou tatalo, o lona uiga o taimi uma tatou te tatalo ai mo se mea, o le a tatou maua? (*Leai. Ona e iai nisi taimi tatou te ole ai mo mea e le o tusa ma lona finagalo, pe le o iai i Lana fuafuaga mo tatou. O se isi fa'aupuga, tatou te ole mo se mea e silafia e le Atua e lē*

aogā ma lē lelei mo tatou.)

PESE: “IESU E, O LA’U TATALO.
IA O’O MAI LOU MĀLO.
IA FAIA LOU FINAGALO,
E PEI O I LUGA.”

Ia Manuia le Aso Sa.

E MAFAI ONA LELE? (WILL IT FLY?)

O le a a’oa’oina tamaiti i le talitonu e tali le Atua i tatalo.

ULUTALA FESO’OTA’I: Talitonu, Tatalo

MEA E MANA’OMIA:

Va’alele pepa, Pepe ta’alo, Ta’avale toy, Se tusi.



UMI O LE FA’ATINOGA:

Pe a ma le 10 minute

TAPENAGA:

Fai muamua le va’alele pepa, ae le’i amataina le vasega.

FA’ATONUGA O LE FA’ATINOGA:

Fa’aali uma meata’alo i le vasega ma fesili i ai, po’o fea o mea na e manatu latou e mafai ona masagi ma lele? Ona fa’alele ta’itasi lea ma va’ai pe le toe pa’ū ifo.

FA’ATATAU:

>Fesili i le vasega. O fea o meata’alo ia na faigofie ona manatu e mafai ona masagi ma lele?

A’o fea o mea na e faigata ona talitonu e masagi ma lele? Aisea?

>Taumafai e fa’amalamalama o le iloa o le telē ma le mamafa po’o le māmā o le meata’alo sa togi i luga,

na faigofie ai ona manatu e mafai ona masagi ma lele.

>E tai fa’atusa fa’apena le manatu i a tatou tatalo. O le iloa o le Atua e alofa, e iai lona mana, ma mafaia

so’o se mea, e faigofie ai ona manatu na te tali mai i a tatou tatalo. Ae faigofie fo’i ona tatou iloa e

fa’afofoga mai o Ia i a tatou tatalo, pe a tatou masani lelei ma Ia.

>Ae tusa pe faigata i se tagata ona talitonu e mafai e le Atua ona tali mai i tatalo, e mafai ona tatou tatalo

pea ma ole mo lana fesoasoani, ma talitonu o Ia o le Atua amiotonu. E fa’amaoni lana Upu, e le pepelo.

ASO SA: SETEMA 24, 2023.

SUEGA

MATAUPU - MATAUPU FA'AMANATU.

Sini – FESILI MA TALI

FA'ATINOGA O LE MATAUPU: Faatalofa atu i lau susuga le faiaoga i lenei taeao fou, i le alofa ma le agalelei o le Atua. Ae ua tatou oo mai i le Aso Sa lenei o Suega a nai fanau. Ua iai le faamoemoe, o le a tapena ane e lau susuga le suega tu'ugutu (Oral Test) a le fanau i nisi fesili ua e saunia, e toe fa'amanatu ai a latou mataupu ua tuana'i. O le fa'amoemoe tāua lava mo nai fanau laiti, ia manatua pea ma fa'amasani la latou fa'alogi i upu o le Tusi Paia, ma ia avea ma fa'avae mautū o lo latou ola tuputupua'e ma le a'oa'oina i le Tusi Paia aemaise o le aga'i atu i le lumana'i.

FESILI

1. O a foi ia mea o amataga fou?
(Ua tuuese mea tuai, ae amata mea fou ia Iesu)
2. E faatulagaina taimi e tatau ona tatou tatalo ai?
(E so'o se taimi lava ia tatou tatalo ai)
3. O le a foi lea mea e ta'u o le faamagalo?
(Alofa i le tagata, la e ita mai ia te oe, ma faatalofa iai)
4. O le a le uiga o le vivi'i i le Atua?
(Fa'afetai pe fai ni upu e iloa ai lou loto fiafia ona o Ia ma mea uma ua Ia faia mo oe).
5. O ai e tatau ona vivi'i i le Atua?
(So'o se tagata lava e ola ma maua le manava mai le Atua).
6. O le a le taimi e tatau ai ona e vivi'i i le Atua?
(O taimi uma lava e tatau ona e manatua ai o Ia ma ona uiga lelei)
7. Afai ua tatou iloa Iesu ma alolofa ia te Ia, o tatou ni tagata fou pe tuai?
(O tatou o tagata fou)
8. O le a se mea ua te'a ese ma tatou?
(Tagata tuai)
9. O le a lea mea e ta'u o le tagata tuai?
(Amio sa masani ai. Lē usita'i, augatā, pepelo.)
10. O ala o le Atua, o tatou ala fo'i ia, pe leai?
(Leai, e ese ala o le Atua, ese ala o tatou)

Fa'afetai tele i lau Susuga i le faiaoga mo le galuega mae'a o lenei taeao, malo le tapena fa'afetai le onosa'i i le galuega, taofi o lo'o sologa manuia pea le feagai ai ma le a'oa'oina o

nai fanau. A mae'a le suega ia toe fa'amanatu ni pese se tasi pe lua, ia ma faia se tatalo e malolo ai.

Ia Manuia Tele Lenei Aso Sa

IA MANUIA TAPENAGA UMA MO LE LOTU TAMAITI

ASO SA: NOVEMA 05, 2023

MATAUPU: "FA'AGASOLOGA O LE ASO FA'AFETAI: "MOSE MA MIRIAMA"

TUSI FAITAU: Esoto 15:1-6, 19-21

Sini: Ia mafai e tamaiti ona fa'aali atu i le Atua o latou loto fa'afetai i le usu o pese ma vi'iga.

FESOASOANI MO LE FAIAOGA:

Fa'afetai ua mae'a galuega o le Lotu Tamaiti, o se tasi vaega tele ma le tāua o lo outou soifua tautua e ala i fanau. Mālo galulue. Ae o le vaega mulimuli lenei o a tatou lesona mo le tausaga fa'ale kalena. Ua *tatou* o'o mai i le masina o le Aso Fa'afetai, o le fa'agasologa lenei o ona lesona. E muamua le fa'afetai a le nu'u o Isaraelu, na ta'ita'iina e Mose ina ua lafoina Farao ma Aikupito i le Sami Ulaula. O lo'o fa'amauina fo'i le tago ifo o Miriama le tuafafine o Mose ma Arona i le topa, ma usu lana pese fa'afetai ae mulimuli atu ai fafine uma o Isaraelu. Ia tata'i lava mafaufau o tamaiti i le aso malolō aupito tāua o lenei masina: O le Aso Fa'afetai, ma lona uiga. Fa'aali ni ata o aiga o lo'o fiafia ma mafuta fa'atasi i le agaga fa'afetai.

FESOASOANI MO LE MATAUPU:

1. Amata i le fesili: *E iai se isi e mafai ona ta'u mai le Aso Malolō tāua lava o le masina lenei o Novema?*

2. A leai se tali, sui le fesili: *O ai e manatua le aso e tele ina 'ai ai le manu fo'i lea o le pīpī/(turkey)?*

3. Se'i tatou toe mafaufau i le mafuaga o lenei Aso Malolō ma lona tāua. Na o ese mai tagata Peretania na

muamua nonofo i Amerika; sa le'i faigofie le amataga. Na tu'ua latou fanua, fa'ato'aga, ma olaga mautū

ae o mai e tau atia'e se nofoaga fou. Sa feagai ma le sauā o tagatānu'u na iai, leai ni mea 'ai, malulū le

tau, ae taumafai lava. Totō fa'ato'aga fau fale e nonofo ai, ma ua masani ma nisi tagatānu'u na

fesoasoani e fa'asino i ai le faiga o fa'ato'aga. Ina ua selesele fua o a latou fa'ato'aga muamua, na

nonofo ifo loa ma fai le fa'afetai i le Atua, ma a'ai i fua o a latou fa'ato'aga ua tele.

4. O le tala ia Mose ma Arona ma lo la tuafafine o Miriama. O le tala i le fanauga a Isaraelu. Sa nofo pologa

i Aikupito i tausaga e tele, ma matuā fa'asauā i ai Farao. Na tatalo ma fetagisi i le Atua i le fia sa'oloto.

Ona tali lea o le Atua, ma fa'atonu Mose e alu e ta'ita'i ese Isaraelu mai Aikupito. Ae te'i fo'i ua toe sui

le mafaufau o le tupu o Farao, ma toe taofi Isaraelu. Na fa'amalaia e le Atua Aikupito se'ia o'o ina **Ioe**

mai Farao e o. Ae tuliloa fo'i e Farao ma taumafai e aumai e toe fai ma ana pologa. Na o'o loa i le Sami

Ulaula, fai loa le vavega e le Atua, ua vaelua le sami ae savavali ai Mose ma le fanauga a Isaraelu se'ia

o'o uma i le isi itu. Ae mulimuli atu lava Farao. Na o'o uma loa Isaraelu i le isi itu, toe fa'afoti loa e le

Atua le sami i le mea na iai, ae maua ai Aikupito i totonu; ua malelemo uma ai. Na iloa mai e Mose ma

Isaraelu le mea ua tupu, ona usu ai loa lea o le latou pese fa'afetai.

5. O le tala ia Mose & Miriama e fa'amanatu mai ia tatou maua le loto fa'afetai i le Atua mo fa'amanuiaga.

6. E iai se isi e fia fai sana tala i se mea ua lagona ai lona loto fa'afetai?

7. **FA'AI'U:** Na fa'ailoa le agaga fa'afetai o Mose ma Miriama e ala i le pepese, vivi'i ma ta la'aupese. E

mafai fo'i ona fa'ailoa fa'apena o tatou loto fa'afetai. E talitonu e fiafia ai fo'i le finagalo o le Atua.

FESILI:

- O le a le mea na fai e Mose e fa'ailoa ai lona loto fa'afetai? (*Na usu lana pese*)
- Aisea na fia fa'afetai ai Mose? (*Ina ua vaelua e le Atua le sami, ma malelemo ai ona fili*)
- O ai le isi na fa'ailoa lona loto fa'afetai i le pese? (*Miriama le tuafafine o Mose ma Arona*)

PESE:

1. E lelei, e lelei, e lelei tele le Atua"

E lelei, e lelei, e lelei tele le Atua.

E lelei tele le Atua, e leoleo ia i ta'ua,

le Atua poto,

E pei o Isaraelu nai le vaomatua.

loloto.

2. Farao tu'u mai lo'u nu'u se'i matou o

E vivi'i ma fai taulaga i le vaō.

Farao ua ma'a'a lona loto, na te lē iloa

Na i'u inā momoe uma ai i le sami

Ia Manuia Tele le Aso Sa.

ASO SA: NOVEMA 12, 2023

MATAUPU: "FA'AGASOLOGA O LE ASO FA'AFETAI: "NA FA'AFETAI HANA"

TUSI FAITAU: 1 Samuelu 1:10-11, 20, 24-28; 2:1-2

Sini: Ia iloa e tamaiti e mafai ona fa'ailoa le loto fa'afetai i le fa'amatu'u atu o se mea tāua ia te oe.

FESOASOANI MO LE FAIAOGA:

Mālo galulue. O le lesona lona lua leni o lesona o le Aso Fa'afetai. O le Aso Sa nei o le tala ia Hana ma lona loto fa'afetai, ae ese le auala e fa'aali ai. E lelei ona faitau tusi eseese ua tu'uina atu e saunia atili ai lau Susuga mo le lesona. Ia iloa e tamaiti e eseese auala e mafai ona fa'ailoa ai le loto fa'afetai. A fa'amatala le tala ia Hana, ia taumafai e tata'i mafaufau o

tamaiti i le agaga fa'afetai o Hana ma le auala na fa'ailoa ai. E lelei ona fa'aaogā se ata o Hana ma mea na ia faia e iloa ai lona loto fa'afetai.

FESOASOANI MO LE MATAUPU:

1. Fa'alauiloa le lesona, fa'amamafa le upu 'FA'AFETAI' – Aso Fa'afetai. O le Fa'afetai a Hana.

2. E lelei pe a amata i le pese e 92 f. 1: *Fa'afetai i le Atua*. O le pese e iloa uma e tamaiti ma usu fa'atasi ai.

3. Fa'amatala le tala iā Hana. Ia pa'i i le talia o le tatalo a Hana ma le auala na fa'afetai ai i le Atua.

- O Hana o se tinā sa leai sana tama. E tele tausaga o nonofo ma lona to'alua, ae leai sana tama.
- Sa alu so'o Hana i le falesa e tatalo ai i le Atua fa'amolemole e foa'i mai sana tama. E tagi lava ma tatalo. Na manatu le ositaulaga i le falesa, o Hana o se tinā ua onā, auā sa tagi ma tatalo e leai se leo.
- Na tauto fo'i Hana i le Atua, afai e tali mai i lana tatalo, na te toe foa'i atu le tama e fai mana taulaga.
- Ua o'o ina fanau Hana, ona fa'atali lea se'i malosi le tama. Ona o lea o la'ua ma lona to'alua o Elekana e ave povi ma mea e osi ai le taulaga i le Atua, fa'atasi ma Samuelu e ave i le malumalu i le faitaulaga o Eli, e auauna ai Samuelu i le Atua i aso uma o lona ola.
- O le fa'ailoga lea o le agaga fa'afetai o Hana i le Atua ina ua tali mai i lana tatalo. Ua foa'i atu le mea e sili ona pele i lona loto, o lana tama e to'atasi. Na toe foa'i e le Atua nisi tama iā Hana.
- Sa tatalo Hana ma le fiafia, fai mai: *Ua olioli lo'u loto i le Ali'i...E leai se pa'ia e tusa ma le Ali'i.*"

4. E eseese auala e fa'aali ai o tatou loto fa'afetai i le Atua i ana meaalofa ma fa'amanuiaga i o tatou olaga.

5.FA'ATINOGA:Va'ai le fa'atinoga o i lalo, MEAALOFA O LE FA'AFETAI – GIFTS OF THANKS.

6.FA'AI'U: E iai se taimi na e foa'ia ai pe ave i se isi se mea e tāua iā te oe? E te manatua na faigofie pe na

faigata? E lē faigofie le foa'i atu o se mea tāua pe pele ia te oe, aemaise se tagata, pei o se tama" a se isi.

Ae a e manatu i le tagata lea e ave i ai lau foa'i, ona fesoasoani lea o le tulaga lena i le faiga o lau

filifiliga. Atonu e faigofie ona fa'amatu'u atu se mea tāua i se isi e te alofa i ai, ma tāua fo'i i lou manatu.

Manatua le tatalo mulimuli a Hana? "*Ua olioli lo'u loto i le Atua, e leai se tasi e tusa ma Ia.*"

FESILI:

- O le a le mea na fai e Hana a'o tatalo? (*Tagi*)
- O le a lona mana'o na tatalo ai? (*Fia maua sana tama*)
- O le ā lana tautoga na fai i le Atua? (*E toe foa'i atu lana tama i Atua, e lē o'o se tafi i lona ulu*)
- Na tali le Atua i le tatalo a Hana? (*Ioe*)

- Na tausī e Hana lana tautoga i le Atua? (Ioe. Na toe foa'i lana tama e auaina i le Atua).

PESE:

1. Sa tatalo le tinā o Hana
Na ona memu ae lē tautala,
Lona mana'o fīa maua se tama,
E fai ma ana taulaga.

2. Lē Atua ua tali iā Hana
Aumai Samuelu le ositaulaga;
Na tauto Hana e ave le tama,
E fai ma ana taulaga.

Ia Manuia Tele le Aso Sa.

MEALOFA O LE FA'AFETAI – (GIFTS OF THANKS)

O le a iloa e tamaiti nisi ala eseese e fa'ailoa ai le loto fa'afetai.

ULUTALA FESO'OTA'I:

Loto Fa'aetai, Tatalo, Taulaga

MEA E MANA'OMIA:

Ni meaalofa laiti ua affi pe tu'u i ni taga pepa.

Mea i totonu o taga poo pusa:

1. Ata /poo sticker o se fatu,
 2. Se paluni,
 3. Se polo la'itiiti
 4. Se peni vali (crayon)
 5. Se seleni
 6. Se lole
- >Fa'atele taga pe a to'atele le vasega.
Pepa affi meaalofa, seleulu, tape



UMI O LE TA'ALOGA:

Pe a ma le 10 minute

TAPENAGA:

Affi ta'itasi meaalofa, pe tu'u i ni taga pepa laiti, ae le'i amataina le vasega.

FA'ATONUGA O LE FA'ATINOGA:

Fa'asolo le avanoa e sau ai le tamaitiiti e piki sana meaalofa, ma tatala i luma o le vasega, ma fa'aali le meaalofa i le vasega, ma fa'atali se'i fai le fa'amalamalama o lana meaalofa.

Ata/sticker o le fatu: E finagalo le Atua ia tatou talitonu ia te Ia ma o tatou loto (fatu) atoa. Na Ia auina mai Iesu e maliu mo a tatou agasala. A tatou fa'atuatua ia te Ia, o lona uiga, ua tu'u atu o tatou loto/fatu ia te Ia! O le ala aupito sili lea e fa'aali ai o tatou loto fa'afetai i le Atua.

Paluni: E fa'afefea ona fa'aputa le paluni lea? (feula i ai le 'ea). A tatou fa'aaoga o tatou 'ea (pei o leo), e pepese ai pe tautala e vivi'i i le Atua, e fiafia le finagalo o le Atua.

Polo: O le isi auala e fa'aali ai lou loto fa'afetai, o le fa'asoa au meata'aalo, pe fa'aaogā e avatu ai le fiafia i nisi tamaiti e leai ni a latou meata'alo, pe a tou ta'aalo fa'atasi.

Peni Vali: E aogā le penivali lea e valivali ai se ata manaia, ma faimeaalofa ai i se isi; pei o lou tinā, po'o se isi tagata na fesoasoani ia te oe.

Seleni: E mafai fo'i ona fa'ailoa lo tatou loto fa'afetai e ala i le foa'i atu o tupe i nisi o fia maua le fesoasoani, po'o le lotu.

Lole: E mafai fo'i ona fa'ailoa lou loto fa'afetai e ala i le fa'asoa o au mea'ai ma se isi o lo'o fia maua se mea'ai.

ASO SA: NOVEMA 19, 2023

MATAUPU: "FA'AGASOLOGA O LE ASO FA'AFETAI: "NA FA'AFETAI PAULO"

TUSI FAITAU: Filipi 1:1-21

Sini: Ia iloa e tamaiti e mafai ona tatou fa'afetai i le Atua, tusa po'o a mea e o'o mai.

FESOASOANI MO LE FAIAOGA:

O le lesona mulimuli leni o le **agaga fa'afetai**. O le fa'afetai a Hana na fa'aali i le foa'i o lana tama. A'o le a tatou talanoa i le aposetolo o Paulo ma lona loto fa'afetai. E pei ona eseese auala e momoli ai le fa'afetai i le Atua, e fa'apena fo'i ona eseese mafuaga e ala ai le fa'afetai. O le fa'afetai a Paulo na fa'aosofia ona o tagata o le Ekalesia i Filipi na fesoasoani ia te ia i ona puapuagā. Sa falepuipui Paulo ona o le tala'iga o le Talalelei, ae le'i o ese tagata o le Ekalesia a Filipi, na tutū ma lagolago pea iā Paulo. O le ala lea o lona loto fa'afetai, fa'atasi ma lona fa'afetai mo le avanoa e tala'i ai le Talalelei, e ala i lona iai i le falepuipui..

FESOASOANI MO LE MATAUPU:

1. Toe fai fa'atasi le lesona o le asō, fa'amamafa le upu '**FA'AFETAI**'. O le **Fa'afetai a Paulo** le

aposestolo.

2. O le tala i le aposetolo o Paulo ma mea faigata na o'o ia te ia a'o feagai ma le tala'iga o le Talalelei.

3. Na lamatia, sauāina ma afātia, ma i'u lava ina lafo i le falepuipui i Filipi.

4. E le o se nofoaga fiafia le falepuipui; e ave i ai tagata e fa'asala. Ua lē toe fa'atasi ma aiga, uō, ma tagata

masani. Ua lē toe maua mea e tele sa masani ai a'o i tua i latou aiga, Ae sa fiafia pea ma fa'afetai Paulo

ona e leai se mea na mativa ai o ia. O mea uma na mana'omia sa avatu i ai e tagata o le aulotu a Filipi.

5. Sa tatalo fa'afetai Paulo mo tagata Filipi i taimi uma na te manatua ai i latou.

6. Na fa'afetai fo'i Paulo ona ua ave lona iai i le falepuipui e maua ai le avanoa e tala'i ai Iesu.

7. E iai tagata na fiafia ina ua falepuipui Paulo ma manatu o le a lē toe lauga ma lē toe fa'alogo ai nisi i le

igoa o Iesu. Ae sa atili ai ona to'atele tagata e fa'alogo i le tala iā Iesu ma fa'alautele le Talalelei.

8.O auala uma na sa maua ai le agaga fa’afetai e Paulo a’o iai i Filipi. O le alolofa o tagata, aemaise le

avanoa e tala’i ai le Talalelei i se nofoaga sa lē manatu se isi e mafai ona fai ai se tala’iga, o le falepuipui.

FA’AI’U: Na tusi le tusi fa’afetai a Paulo i le Ekalesia i Filipi a’o i totonu o le falepuipui. Sa tatalo fo’i e fa’afetai i le Atua e lē aunoa. O le a’oa’oga mo tatou mai lenei tala, ia tatou fa’afetai pea i le Atua mo mea uma tusa pe foliga faigata. O lo’o silafia e Ia mea uma lava tatou te faafetai atu ai ia te Ia.

FESILI:

- O ā taimi e fa’afetai ai Paulo mo tagata Filipi? (*taimi uma e manatua ai latou*)
- O fea na iai Paulo a’o tusi lana tusi iā Filipi? (*i le falepuipui*)
- O ā ni mea na mafua ai ona fa’afetai Paulo i le Atua? (*O le alolofa o tagata o le Ekalesia a Filipi, ma le avanoa na ia maua e tala’i ai Iesu a’o iai i totonu o le falepuipui*).
- O le ā le a’oa’oga mo tatou i lenei tala? (*fa’afetai i le Atua i mea uma lava, tusa pe faigata*).

PESE: GIVE THANKS WITH A GRATEFUL HEART

Give thanks with a grateful heart
Give thanks to the Holy One
Give thanks because He’s given,
done for us.
Jesus Christ His Son

And now,

Let the weak say “I am strong”;
Let the poor say, “I am rich”,
Because of what – the Lord has

Give thanks.

We give thanks.

We give thanks!

Ia Manuia Tele le Aso Sa.

ASO SA: NOVEMA 26, 2023

MATAUPU: “O FA’ATAOTO – O SE UŌ E IAI LONA MANA’OGA”

TUSI FAITAU: Luka 11:5-13

Sini: Ia iloa e tamaiti e mafai ona tatou tatalo i le Atua mo mea tatou te mana’omia atoa ma mana’oga o isi tagata.

FESOASOANI MO LE FAIAOGA:

O le lesona mulimuli lenei o le tausaga, soso’o ma Su’ega Fa’ai’u ma aga’i atu ai i le Kersimasi. O le tusi faitau atoa lena; e lelei ona faitau uma fuaiupu e iai le tala i le fa’ataoto, ma isi fuaiupu i lalo ifo. E ui o le fa’ataoto e fa’atatau i le uō na sa’ili fesoasoani mo lona mana’oga, ae tāua fo’i le folafolaga lauiloa a le Ali’i i le fuaiupu e 9 & 10. Manatua o le fesili a le tagata mo se areto mo lana uō, e fa’atusa i lo tatou fesili, pe ole atu i le Atua i mea tatou te mana’omia. Na iai loa le mana’oga o le tagata lea, tula’i loa ma alu i lē na te iloa e maua mai ai lona fesoasoani. O le fa’atusa i lo tatou ō sa’o i le Atua ma ō tatou mana’o, ae lē o le

muamua sa'ili solo se'iloga ua lē maua, ona fa'ato'ā ole lea i le Atua. E tāua lo tatou tatalo fa'atauanau, tatalo ma le lototele o le finagalo lea o le Tamā mo i tatou, aemaise lava o le tatalo ma le fa'atuatua ma le talitonu e tali mai o Ia.

FESOASOANI MO LE MATAUPU:

1. Faitau muamua i le vasega le tala mai le Tusi Paia.
2. Fai loa le FESILI e fa'atupu manatu: *E iai se isi e mafai ona ta'u mai sona mana'o na fesili ai i se isi e fia maua? Na maua la lou mana'o?*
3. O le tala lea na tatou faitauina, o le tasi tagata na o atu ana mālo i le po, ae leai sana mea 'ai e laulau i ai. Ona alu lea i lona tuāoi e fesili i ai mo ni areto po'o se falaoa e laulau i ana mālo. Ona o le leva o le po na alu ai i lona tuāoi, fai mai na umi ona tu'itu'i fa'ato'ā tatala mai le faitoto'a. Ae tatala mai fo'i ma fai mai, e 'aua le fa'alavelave ua momoe le latou aiga. Sa tu'itu'i pea le tagata na alu atu e su'e mea 'ai, se'ia i'u ina tatala mai.
4. O le tele ia o a'oa'oga aogā i lenei tala po'o le fa'ataoto a Iesu mo tatou:
 - E fa'atusa le fesili i le tuāoi mo le mea na ia mana'o i ai, i le ole i le Atua i mea tatou te mana'omia. Alu sa'o i le tagata e te iloa e maua ai le tali o lou mana'o.
 - O le tu'itu'i pea o le tagata, tusa pe umi e le'i tali mai – e fa'atusa i ai la tatou tatalo pea fa'atauanau i le Atua i se mana'oga. 'Aua le fiu gofie pe a tasi, lua, tatalo ae le maua se tali.
 - Tigā ona fia moe le tuāoi, ae na tula'i ma tatala le faitoto'a ma ave le mea na mana'o ai le tagata na ole mai, ona o le fesili atu pea. E tāua le tatalo fa'atauanau.
 - Na fesili le tagata mo se mea 'ai mo ē na o atu i lona fale, ae lē mo ia. O lona uiga e mafai fo'i ona tatou tatalo mo mana'oga o isi tagata, ae lē na'o tatou lava mana'o.
 - O le folafolaga fa'amalosiloto a Iesu: ***Ia outou ole atu, ona foa'iina mai ai lea ia te outou. Ia outou sa'ili, ona outou maua ai lea. Ia outou tu'itu'i atu, ona toina mai ai lea ia te outou.***

FA'AI'U: Ia tatou fa'amuamua le Atua i a tatou sa'iliga ma mea e fai; o lona finagalo lena. Ia tatou

sa'ili muamua le mālo o le Atua ma Lana amiotonu, ona fa'aopoopoina mai lea o ia mea uma iā te outou.

Ia tatou iloa e tali le Atua i a tatou tatalo uma, ae le fa'apea e tali mai IOE i taimi uma. Na te silafia le

tali e talafeagai ma i tatou.

FESILI:

1. Na tali lelei mai le tuāoi i le tagata na alu atu i le faitoto'a? (*Leai*)
2. Ae aiseā na i'u ai ina tula'i ma ave areto i lē na aisi atu? (*Ona o le fai mai pea; e lē alu ese*).
3. O lona uiga la so'o se mea tatou manana'o i ai, e ole ai i le Atua, tatou te maua? (*Leai. E silafia e le Atua mea e tatau ma aogā mo tatou. O le tali fo'i le LEAI i isi mana'o*).

PESE: O IESU O LE UŌ UA SILI / Oh! The Best Friend To Have Is Jesus

Manuia tele le Aso Sa

ASO SA: TESEMA 03, 2023.

MATAUPU - MATAUPU FA'AMANATU.

Sini – Ia toe fa'amanatu ma toe fa'atalanoa mataupu sa outou galulue ai ma fanau i le 'afa mulimuli lenei o le tausaga ua toe tasi le Aso Sa ma'ea.

FA'ATINOGA O LE MATAUPU: Ia toe faamanatu mataupu mai i le amataga o Aokuso, se ia oo mai i le Aso Sa ua tuanai atu. Ia tapena ane e lau susuga le suega tu'ugutu (Oral Test) a le fanau i fesili ua saunia, e toe fa'amanatu ai a latou mataupu ua tuana'i. O le fa'amoemoe taua lava o nai fanau laiti, ia fa'amasani le latou fa'alogo i uiga o upu ia o le Tusi Paia, ma ia avea ma tauloto, e fa'avae ai lo latou ola a'oa'oina i le Tusi Paia i le aga'i atu i le lumana'i.

Lesona 1: Amataga Fou e oo mai i le Lesona 10: O se uo e iai ona manaoga.

1. E faatulagaina taimi e tatau ona tatou tatalo ai?
(*Leai, ia so'o se taimi lava*)
2. O le a le uiga o le vivi'i i le Atua?
(*Fa'afetai pe fai ni upu e iloa ai lou loto fiafia ona o Ia ma mea uma ua Ia faia mo oe*).
3. O ai e mafai ona vivi'i i le Atua?
(*So'o se tagata lava e ola ma maua le manava mai le Atua*).
4. Fa'afefea pe afai ou te le iloa tatalo e vivi'i ai i le Atua?
(*E mafai foi ona usu sau pese fa'afetai ma vivi'i*).
5. E tutusa manatu o le Atua ma o tatou manatu?
(*E leai e le tutusa*)
6. O le a le mea na fai e Mose e fa'ailoa ai lona loto fa'afetai?
(*Na usu lana pese*)
7. Aiseā na fia fa'afetai ai Mose?
(*Ina ua vaelua e le Atua le sami, ma malelemo ai ona fili*)
8. O ai le isi na fa'ailoa lona loto fa'afetai i le pese?
(*Miriama le tuafafine o Mose ma Arona*)
9. Na tali lelei mai le tuāoi i le tagata na alu atu i le faitoto'a?
(*E leai*)

Fa'afetai tele i lau Susuga i le faiaoga mo le galuega mae'a o lenei taeao, malo le tapena fa'afetai le onosa'i i le galuega, taofi o lo'o sologa manuia pea le feagai ai ma le a'oa'oina o nai fanau. A mae'a lesona toe faamanatu, ia toe fa'amanatu ni pese se tasi pe lua, ia ma faia se tatalo e malolo ai.

ASO SA – TESEMA 10, 2023

MATAUPU – SUEGA FAAIU:

SINI – FESILI MA TALI

FA'ATINOGA O LE MATAUPU: E fa'afetai atu i a outou Susuga i faiaoga mo le galuega sa feagai ai i lenei 'afa-tausaga fa'a-le a'oa'oga ua tatou o'o mai ai i lona Aso Sa lona lua lenei o le masina mulimuli o lenei Tausaga 2023. Malo le onosa'i, fa'afetai le lava papale i le galuega a le Atua. O le Aso Sa mulimuli lenei o a tatou mataupu i lenei foi vaega o le tatou Aoga Aso Sa, ua fa'atulagaina mo a tatou su'ega mulimuli, ua i lau Susuga lava le fa'amoemoe o a tatou fanau, ia saunia ni fesili mai lava i le mataupu muamua se ia o'o mai i le fa'aiuga, peitai, e le o aveesea ai lava a tatou fesili mai mataupu sa a'oa'oina ai fanau mai lava i le amataga o lenei afa-tausaga, ae taoto atu lava i lau Susuga lea fa'amoemoe a fanau. Fa'afetai, fa'afetai, fa'afetai tele le lagolago mai.

1. O a foi vaega sa tatalo ai Iesu i lana tatalo?

(Mea 'ai, Fa'afetai, Fa'amagalo, Lavea'i, etc.)

2. E faatulagaina taimi e tatau ona tatou tatalo ai?

(E leai, e tatau ona tatou tatalo i so'o se taimi)

3. O le a foi lea mea e ta'u o le faamagalo?

(Agalelei ma alofa i le isi tagata, la sa ita mai ia i tatou)

4. O le a le uiga o le vivi'i i le Atua?

(Fa'afetai pe fai ni upu e iloa ai lou loto fiafia ona o Ia ma mea uma ua Ia faia mo oe).

5. O ai e mafai ona vivi'i i le Atua?

(So'o se tagata lava e ola ma maua le manava mai le Atua).

6. O le a le taimi e tatau ai ona e vivi'i i le Atua?

(O taimi uma lava e tatau ona e manatua ai o Ia ma ona uiga lelei)

7. Fa'afefea pe afai ou te le iloa tatalo e vivi'i ai i le Atua?

(E mafai foi ona usu sau pese fa'afetai ma vivi'i).

8. E tutusa manatu o le Atua ma o tatou manatu?

(E leai e le tutusa)

9. O ai foi lea na fesili ia Iesu?

(O Peteru)

10. O le a le mea na fai e Mose e fa'ailoa ai lona loto fa'afetai?

(Na usu lana pese)

11. Aiseā na fia fa'afetai ai Mose?

(Ina ua vaelua e le Atua le sami, ma malelemo ai ona fili)

12. O ai le isi na fa'ailoa lona loto fa'afetai i le pese?
(*Miriama le tuafafine o Mose ma Arona*)
- 13 O ā ni mea na mafua ai ona fa'afetai Paulo i le Atua?
(*O le alolofa o tagata o le Ekalesia a Filipi, ma le avanoa na ia maua e tala'i ai Iesu a'o iai i totonu o le falepuipui*).
- 14 O le ā le a'oa'oga mo tatou i lenei tala?
(*fa'afetai i le Atua i mea uma lava, tusa pe faigata*).
- 15 Aisea, e tatou te faafetai ai i le Atua?
(*E tatau ona tatou faafetai i le Atua i mea uma lava ua Ia faia mo i tatou*)

FA'AMANUIA ATU LE TU'UAGA MA MALOLOGA A LE FANAU I LENEI VAITAU
O ASO FIAFIA MA LE FAAMANATUINA O LE KERISIMASI O LENEI TAUSAGA
2023

IA MANUIA LE KERISIMASI MA LE TAUSAGA FOU 2024

FA'ASOLOGA O PESE O LESONA 1-10 (Aukuso 6 – Tesema 10, 2023)

- Lesona 1: “TULEI ESE, TULEI ESE, TULEI ESE”
- Lesona 2: “MATAGOFIE, E LELEI” / *“Beautiful, beautiful, Jesus is Beautiful”*.
- Lesona 3: “FA'ATUATUA I LE ATUA” / *“Have faith in God”*.
- Lesona 4: “IESU, IA A'OA'O MAI A'U I LE TATALO”
- Lesona 5: “IA TATALO, TATALO I LE MANA O LĒ UA AFIO MAI
- Lesona 6: “IESU E, O LA'U TATALO; IA O'O MAI LOU MALO”
- Lesona 7: “E LELEI, E LELEI, E LELEI TELE LE ATUA”
- Lesona 8: “SA TATALO LE TINĀ O HANA”
- Lesona 9: “GIVE THANKS WITH A GRATEFUL HEART”
- Lesona 10: “O IESU O LE UŌ UA SILI” /*Oh, the best friend to have is Jesus*



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org